



Novs impuls per il chant rumantsch

Il terz Festival da la chanzun rumantscha che ha gì lieu ils ultims trais dis a Vella en Val Lumnezia è stà in success cumplain. Tant la concorrenza da cumposiziuns sco il vast program accompagnant cun concerts da differentas furmaziuns, chant avert per uffants e famiglias, intermezzis e referat han documentà ch'il chant rumantsch viva ed è fitg innovativ. Passa 1500 persunas han visità ils arranschaments a Vella, ulteriuras 1000 persunas han persequità els via livestream sin RTR.

Suenter Trun 2019 e Zuoz 2022 ha il terz Festival da la chanzun rumantscha gì lieu questa fin d'emna a Vella. Ina da la finamiras principalas da l'Uniun chanzun rumantscha, presidiada dal musicist *Clau Scherrer*, è da promover cumposiziuns novas per chors. A la concorrenza da cumposiziun da quest onn èn sa participads 27 cumponists - da quai sis cumponistas - cun 45 chanzuns novas en las categorias chor d'uffants (7), chor da dunnas (9), chor maschadà (17) e chor viril (12). Cun lubientscha dals cumponists vegnan las chanzuns fatgas accessiblas sin la pagina d'internet www.chanzunrumantscha.ch.

Las cumponistas ed ils cumponists derivan tant da la Rumantschia, sco da la Svizra tudestga e franzosa e schizunt l'exteriur. Els ed ellas ha mis en musica poesias da 19 auturas ed auturs rumantschs, da quai 12 en sursilvan, 6 en ladin e 1 en surmiran. L'organisaziun da la concorrenza è stada en ils mauns da *Giusep G. Decurtins*. Ina giuria d'experts che sa cumpona da *Lea Scherer*, *Lisa Appenzeller* e *Martin Zimmerman* ha rangà trais cumposiziuns per categoria. Quellas èn vegnidas preparadas dals chors ad hoc dal festival, preschentadas live sin il palc a Vella e transmessas sin livestream da RTR a l'auditori a chasa. Or da questas dudisch chanzuns preselecziunadas ha il public en sala e l'auditori da chasa pudì tscherner la chanzun favorita per scadina categoria. Ils victurs dal Premi dal public èn *Jan van der Roost* (Belgia), *David Lang* (TG), *Flavio Bundi* (GR) e *Cyrrill Schürch* (ZH).

Program accompagnant vast ed attractiv

Il Festival da la chanzun rumantscha è vegnì enritgì d'in program accompagnant vast ed attractiv. Per ina sala fullanada han procurà il venderdi saira il scholars da las 5 e 6 avlas classas primaras da Castrisch, Duin/Pitasch, Glion, Lumnezia, Rueun e Ruschein sut la direcziun da *Flavia Walder* e la sonda saira la Musica giuvenila Surselva e la band da Dario Hess sut la batgetta dal dirigent ed arranschader *Remo Derungs*. Cooperà al concert da rock e pop rumantsch han *Mattiu Defuns* e *Martina Linn* ed ils victurs dal Premi Lions 25 Skyline Walkers e Kliss Me. Plidentà giuven e vegl ha il chant avert per famiglias menà cun il Chor d'uffants da Sumvitg, nua che er babs e mammas, tats e tattas han chantà activamain. Per ina supraisa speciala ha procurà il musicist *Ruedi Lutz*. El ha scret a curt termin la "Chanzun dal festival" tenor in text da *Claudio Spescha*. Plinavant ha el improvvisà al clavazin intermezzis da quatter chanzuns popularas ch'èn vegnidas chantadas spontan dal public en sala. Dumengia ha Iso Albin referi davart la legendara collecziun da chanzuns sacralas «Consolaziun dell'olma devoziusa». Per ina conclusiun culminanta dal festival ha procurà l'ensemble professiunal «Schweizer Vokalkonsort» dirigì da *Marco Imhof* en l'anteriura baselgia da vallada Pleif. Grazia al support da RTR, da vischnanca Lumnezia ed a l'engaschament da las uniuns sut l'egida da *Silvana Caviezel* ha il publicum pudì passentar trais bels dis da chant sin nivel musical elevà ed en empernaivla cumpagnia en Val Lumnezia.

Il proxim Festival vegn ad avair lieu 2028 en Val Schons.

Martin Cabalzar

Victuras e victurs

Categoria: Chor d'uffants

1. Salva el cor
m: Toni Rosenberger, Kriens (LU)
t: Arnold Spescha
2. Anusha
m: Jan van der Roost, Kontich (B)
t: Arnold Spescha
3. Il giat / Adieu alpetta
m: Thomas Thurnher, Dornbirn (A)
t: Artur Caflisch (2 poesias)

*Premi dal public: **Anusha***

Categoria: Chor da dunnas

1. Il vent dalla sera
m: David Lang, Rheinklingen (TG)
t: Arnold Spescha
2. Nina nana, bala beina
m: Sylke Zimpel, Dresden (D)
t: Gion Deplazes
3. Lev / Haver bugen / Sgulei
m: Thomas Thurnher, Dornbirn (A)
t: Arnold Spescha (3 poesias)

*Premi dal public: **Il vent dalla sera***

Categoria: Chor viril

1. Feglia d'atun
m: Flavio Bundi, Glion/Cuira
t: Victor Durschei
2. Tschitta melna
m: Cyrill Schürch, Turitg
t: Gion Battesta Spescha
3. Anemonas
m: Grégoire May, Küsnacht/ZH
t: Jon Guidon

*Premi dal public: **Feglia d'atun***

Categoria: Chor maschadà

1. Saulta ti diala
m: Cyrill Schürch, Turitg
t: Gion Battesta Spescha
2. nagin premi
3. Verd uaul
m: Thomas Tschuor, Zignau/Windisch
t: Giacun Hasper Muoth
3. Al laghet alpin
m: Flavio Bundi, Glion/Cuira
t: Michel Maissen

*Premi dal public: **Saulta ti diala***